

Prema Članu 5 Aneksa III. Općeg okvirnog sporazuma za mir u Bosni i Hercegovini strane su se saglasile da uspostave **stalnu Izbornu komisiju sa odgovornošću za provođenje budućih izbora u Bosni i Hercegovini**. Dakle Aneks III Općeg okvirnog sporazuma za mir u Bosni i Hercegovini ima snagu međunarodnog ugovora kao i cijeli Opći okvirni sporazum za mir u Bosni i Hercegovini.

Nadalje, u skladu sa članom 2.9 Izbornog zakona BiH Centralna izborna komisija BiH je nezavisan organ koji podnosi izvještaj neposredno Parlamentarnoj skupštini Bosne i Hercegovine i čije ovlasti iz nje proizilaze. Isti član propisuje pored ostaloga da Centralna izborna komisija BiH **koordinira, nadgleda i reguliše zakonitost rada svih izbornih komisija i biračkih odbora** u skladu s ovim Zakonom, donosi odluku o održavanju neposrednih izbora u Bosni i Hercegovini, propisanih ovim Zakonom, **odgovorna je za tačnost, ažurnost i ukupni integritet Centralnog biračkog spiska za teritoriju Bosne i Hercegovine** i tako dalje. Naprijed smo izdvojili samo najrelevantnije ovlasti Centralne izborne komisije BiH u odnosu na postavljeno pitanje. A to znači da nijedan drugi organ u BiH ne može donositi odluku o održavanju izbora u BiH, osim CIK BiH.

Pored toga, Odluka Ustavnog suda BiH u predmetu broj U 4/12 (apelacija Sulejmana Tihica) potvrđuje naprijed navedeno, odnosno utvrđuje da niti jedna druga izborna komisija u BiH ne može provoditi izbore bez saglasnosti Centralne izborne komisije BiH, koja po zakonu propisuje nadležnosti svih nižih izbornih komisija. Presuda Ustavnog suda u predmetu broj U 4/12 je dostupna na web stranici CIK BiH pod linkom

<https://izbori.ba/Default.aspx?CategoryID=425&Lang=3>

Na kraju članom 2.21 stav (1) Izbornog zakona BiH utvrđeno je da se izborne komisije entiteta formiraju prema izbornom zakonu entiteta u skladu sa Izbornim zakonom BiH. Njihovu nadležnost utvrđuje Centralna izborna komisija BiH **u skladu sa Izbornim zakonom BiH**. Ta nadležnost je utvrđena Odlukom o utvrđivanju nadležnosti izborne komisije entiteta.(Službeni glasnik BiH, br. 3/02 od 19.2.2002. godine.

U skladu sa naprijed navedenim svako djelovanje u smislu organizacije Općih izbora 2022. godine mimo Centralne izborne komisije BiH bi bilo protivustavno i protivzakonito.